

REGLUGERÐ

um innheimtu gjalda til Búnaðarmálasjóðs.

1. gr.

Greiða skal gjald, búnaðarmálasjóðsgjald, af vöru- og leigusölu í landbúnaði. Gjaldstofn er sá hluti afurðaverðs eða leigu, sem greiðist framleiðendum og leigusölum, hvort sem um er að ræða staðgreiðslu- eða reikningsviðskipti.

Vöru- og leigusala skiptist í tvo gjaldflokka, annars vegar 0,25% gjaldflokk og hins vegar 0,50% gjaldflokk.

Greiða skal 0,25% gjald af:

- a) Eggjum og fuglakjöti.
- b) Svínakjöti.
- c) Eldisfiski frá fiskeldis- og hafbeitarstöðvum, netafiski úr vötnum og ám, lifandi fiski til sölu innanlands eða utan (þ. m. t. eldisseiði) og leigu af útleigðri lax- og silungsveiði.
- d) Leigu á landi lögbýla skv. skilgreiningu í 1. gr. ábúðarlaga nr. 64/1976 til annarra nota en búrekstrar, svo sem leigu sumarbústaðalóða, leigu tjaldstæða og hagabeitar fyrir hross. Leiga lóða undir ársíbúðarhús er undanþegin gjaldskyldu.
- e) Hestaleigu.
- f) Lífdýrum til alifuglaræktar og svínaræktar.

Greiða skal 0,50% gjald af:

- a) Nautgripaafurðum.
- b) Sauðfjárafurðum.
- c) Hrossaafurðum, þ. m. t. lifandi hross til útflutnings.
- d) Grænmetis-, garð- og gróðurhúsaframleiðslu hvers konar.
- e) Garðávöxtum.
- f) Grávöru.
- g) Skógarafurðum, s. s. eldiviði, reykingarviði, efniviði, girðingastaurum, viðarkolum, jólatrjám, skrautgreinum og könglum.
- h) Trjáplöntum til skrudgarðyrkju og skógræktar.
- i) Æðardún.
- j) Reka.

Undanþegnar gjaldskyldu eru búvörur og hlunnindaafnot til nota fyrir fjölskyldu framleiðanda, sem ekki hafa komið til sölu meðferðar.

2. gr.

Gjald það sem um ræðir í 1. grein, greiðist til Framleiðsluráðs landbúnaðarins af þeim heildisölu- og smásöluaðilum sem kaupa eða taka til sölu eða vinnslu vörur frá framleiðendum, og þeim aðilum sem fyrstir eiga hlut að kaupum, sölu, þjónustu, leigu hlunninda eða lands. Gjaldinu skal halda eftir, hvort sem um staðgreiðslu eða reikningsviðskipti er að ræða. Af gögnum um viðskiptin skal koma fram hver upphæð gjaldsins er.

Framleiðendur sem selja vöru eða leigu án milliliða, skulu standa Framleiðsluráði skil á gjaldinu. Þeir skulu halda skýrslu um alla ráðstöfun afurða, og hvenær sem Framleiðsluráð óskar þess, hafa handbærar upplýsingar um sölu til bókhaldsskyldra aðila og sölu beint til neytenda. Af þessum upplýsingum skal koma fram tegund, magn, flokkun og verðmæti vöru eða leigusölu.

3. gr.

Innheimtu búnaðarmálasjóðsgjalds skal haga þannig, að aðilum sem ber að standa Framleiðsluráði skil á gjöldum skv. 2. gr., skal skylt að senda Framleiðsluráði skrá um gjaldskylda vöru- og leigusölu skv. 1. gr. Framleiðsluráð landbúnaðarins lætur gera eyðublöð fyrir þessar skrár og sendir gjaldskyldum aðilum þær, þeim að kostnaðarlausu. Uppgjör skv. þessum skráum skal fara fram fyrir hvert 3ja mánaða tímabil frá 1. september að telja, innan 20 daga frá lokum hvers tímabils. Skrárnar skulu staðfestar með undirritun löggiltra endurskoðenda, þegar um bókhaldsskylda aðila er að ræða, en annars af fyrirsvarsmanni gjaldanda.

Framleiðsluráð getur heimilað þeim sem hafa með höndum árstíðabundna vöru- eða leigusölu í landbúnaði, s. s. sölu veiðileyfa, hestaleigu o. þ. h. að skila skráum um gjaldskyldu og greiða gjaldið að loknu hverju sölutímabili.

4. gr.

Ef gögn um viðskipti með gjaldskyldar vörur eða þjónustu þykja að mati Framleiðsluráðs ófullnægjandi, eða gjaldskyldur aðili skilar ekki skrá um innheimt gjöld skv. 3. gr., skal Framleiðsluráð skora á viðkomandi aðila að bæta úr því innan ákveðins tíma og láta í té skriflegar skýringar og gögn, sem Framleiðsluráð telur þörf á. Fái Framleiðsluráð fullnægjandi skýringar og gögn innan tiltekins tíma, skal gjaldið ákvarðað og innheimt í samræmi við þau.

Berist svar við áskorun skv. 1. mgr. ekki innan tiltekins tíma, eða ef skýringar eða gögn eru ófullnægjandi, er Framleiðsluráði heimilt að áætla gjaldið og innheimta það skv. þeirri áætlun. Framleiðsluráð skal skriflega tilkynna greiðanda gjaldsins um áætlunina. Telji greiðandi áætlunina ranga, getur hann innan 20 daga frá og með póstsendingardegi tilkynningar um áætlun gjaldsins krafist þess skriflega að Framleiðsluráð taki áætlunina til endurskoðunar. Skal sú krafa rökstudd með söluskrám eða öðrum nauðsynlegum gögnum. Framleiðsluráð skal innan eins mánaðar frá lokum þessa frests gera greiðanda skriflega grein fyrir afgreiðslu á kröfu hans. Heimilt er greiðanda að skjóta lokaafgreiðslu Framleiðsluráðs til landbúnaðarráðherra og skal skrifleg og rökstudd beiðni þar um hafa borist ráðherra innan 30 daga frá póstlagningu bréfs Framleiðsluráðs.

Beiðni um endurskoðun á áætlun gjaldsins eða deila um gjaldskyldu frestar ekki eindaga búnaðarmálasjóðsgjalds né leysir undan neinum viðurlögum, sem lögð eru við vangreiðslu þess. Ef gjaldið er lækkað samkvæmt afgreiðslu Framleiðsluráðs eða úrskurði ráðherra, skal endurgreiðsla þegar fara fram.

5. gr.

Sé gjaldið ekki greitt innan mánaðar frá gjalddaga skv. 3. gr., skal greiða Framleiðsluráði dráttarvexti af því, sem gjaldfallið er. Dráttarvextir skulu reiknaðir hinir sömu og hjá innlánsstofnunum, skv. 13. gr. laga nr. 10/29. mars 1961 og ákvörðun Seðlabanka Íslands á hverjum tíma. Dráttarvextir skulu reiknaðir mánaðarlega fyrir hvern byrjaðan vanskilamánud, eftir 30 daga frá gjalddaga.

Búnaðarmálasjóðsgjald má taka lögtaki.

6. gr.

Jafnhliða búnaðarmálasjóðsgjaldi skal Framleiðsluráð innheimta á sama hátt af söluvörum landbúnaðarins sbr. 1. gr. 0,6%, er renna til Bjargráðasjóðs Íslands sbr. 5. gr. laga nr. 51/1972 um Bjargráðasjóð, sbr. lög nr. 110/1976 og lög nr. 57/1980.

7. gr.

Framleiðsluráð skiptir innheimtum gjöldum og vaxtatekjum skv. reglugerð þessari eigi sjaldnar en ársfjórðungslega á eftirfarandi hátt: Til Búnaðarfélags Íslands 22,73%, til Stéttarsambands bænda 22,73% og til Bjargráðasjóðs Íslands 54,54%. Áður en skipting fer fram, skal draga frá kostnað við innheimtu og endurskoðun.

Þeim hlutum sem Búnaðarfélag Íslands veitir móttöku skiptir það milli búnaðarsambandanna með hliðsjón af gjaldskyldu framleiðsluverðmæti á hverju búnaðarsambandssvæði.

8. gr.

Reikninga sjóðsins skal birta árlega í Búnaðarritinu og Árbók landbúnaðarins, endurskoðaða af endurskoðendum Búnaðarfélags Íslands og Stéttarsambands bænda.

9. gr.

Rísi ágreiningur um gjaldskyldu skv. 1. gr. eða önnur atriði varðandi reglugerð þessa, sker landbúnaðarráðherra úr þeim ágreiningi.

10. gr.

Reglugerð þessi er sett skv. heimild í lögum nr. 40 7. maí 1982 og öðlast þegar gildi. Jafnframt er felld úr gildi reglugerð nr. 166 29. febrúar 1980 um innheimtu til Búnaðarmálasjóðs.

Ákvæði til bráðabirgða.

Þeir sem annast innheimtu á gjöldum skv. þessari reglugerð, skulu fyrir 20. janúar 1983 skila skrám og uppgjöri fyrir gjaldskylda vöru- og leigusölu, sem þeir hafa þegar innheimt eða innheimta fram til 1. desember 1982 og ekki er þegar gjaldfallið skv. ákvæðum reglugerðar nr. 166/1980. Gjöld skv. þessum skrám falla í gjalddaga 20. janúar 1983. Ekki skal innheimta af afurðum eða seldri þjónustu sem í fyrsta sinn varð gjaldskyld skv. lögum nr. 40/1982 fyrr en frá og með 1. júní 1982.

Gjald skv. 1. gr. þessarar reglugerðar af eggjum, fuglakjöti, svínakjöti, netaveiði úr ám og vötnum og leigu af útleigðri lax- og silungsveiði skal reiknast 0,25% frá 1. janúar 1982. Hafi framleiðandi greitt 0,50% gjald af framleiðslu sinni skv. ákvæðum áðurgildandi reglugerðar eftir 1. janúar 1982 skal innheimtuaðili endurgreiða framleiðanda mismuninn.

Landbúnaðarráðuneytið, 11. nóvember 1982.

Pálmi Jónsson.

Sveinbjörn Dagfinnsson.